

共同經課-1 撒母耳記上八章四節～二十節、十一章十四節～十五節

4 以色列 ê 長老 lóng 聚集，到 Láh-má 見撒母耳；5kā 伊講，看 ah，你已經老，你 ê kiáⁿ 無行你 ê 路；taⁿ 求你 kā 阮設立一個王判斷阮，親像列國一樣。6In 講，求你 kā 阮設立一個王判斷阮，hit-ê 事撒母耳無歡喜。撒母耳就祈禱耶和華。7 耶和華對撒母耳講，百姓對你所講一切 ê 話，你 tiòh thàn；因為 in m̄ 是棄 sak 你，是棄 sak 我，無 hō 我做 in ê 王。8Tùi 我 chhoā in 出埃及到今 á 日，in 一切 ê 所行離開我，去服事別 ê 上帝，taⁿ 也照 án-ni 款待你；9 所以你 tiòh thàn in ê 話；總是 tiòh 嚴嚴警戒 in，hō in 知將來管理 in ê 王 ê 制度是怎樣。10 撒母耳用耶和華 ê 話 lóng kā 百姓講，就是 hiah-ê 對伊討一個王 ê 講，11 將來管理 lín ê 王 ê 制度就是 án-ni，伊 beh 取 lín ê kiáⁿ，為家已設立伊 kā 伊管車，做伊 ê 馬兵，走 tī 車 ê 頭前；12koh beh 為家已設立 in 做千總，五十夫長；也 beh 設立人 kā 伊作園，收五穀，製造軍器，kap 車裡 ê 器具；13beh 取 lín ê cha-bó-kiáⁿ kā 伊製造芳油，做煮食 ê，做 pek 餅 ê；14lín ê 田園、葡萄園、橄欖園，hit-ê siōng 好 ê，伊 beh 取伊來 hō 伊 ê 奴僕；15lín 所種作 ê，kap lín ê 葡萄園，伊 beh 取十份一，hō 伊 ê 太監 kap 奴僕。16Koh beh 取 lín ê 奴僕、奴婢、勇健 ê 少年人，kap lín ê 驢，來做伊 ê 差用；17lín ê 羊群，伊 beh 取十份 ê 一份；lín 也 beh 做伊 ê 奴僕；18Hit 時 lín beh 因為所揀 ê 王來喉叫；總是耶和華 tī hit 時 m̄ 聽 lín。19 總是百姓 m̄ 肯聽撒母耳 ê 話，講，M-ah，阮的確 beh 一個王治理阮；20Hō 阮親像列國一樣，阮 ê 王判斷阮，做頭 chhoā 阮，替阮交戰。11:14 撒母耳 kā 百姓講，來 ah，咱來去 Kiat-kah，tī-hia 重再建立國。15 眾百姓就去 Kiat-kah；tī Kiat-kah 當耶和華 ê 面前設立掃羅做王；in tī-hia 獻謝恩祭 tī 耶和華 ê 面前。掃羅 kap 以色列眾人大大歡喜。

共同經課-2 詩篇一百三十八篇

1 大衛 ê 詩。1) 我 beh 專心感謝你，tī chiah-ê 上帝 ê 面前 beh 唱歌 o-ló 你。2 我 beh òng 你 ê 聖殿跪拜，因為你 ê 慈愛 kap 誠實，o-ló 你 ê 名；因為你 hō 你 ê 話做大，贏過你所有 ê 名。3 我求叫 ê 日你就應我，鼓舞我，hō 我 ê 心有氣力。4 耶和華 ah，世上 ê 君王 lóng beh 感謝你，因為 in 有聽見你 ê 嘴所講 ê 話。5In beh 唱歌 o-ló 耶和華 ê 行做，因為耶和華 ê 榮光真大。6 耶和華雖然真高，iáu-kú 看顧卑微 ê 人；總是 I tùi 遠遠看出驕傲 ê 人。7 我雖然行 tī 患難中，你 beh hō 我活；我 ê 對敵受氣，你 beh 伸手來抵擋伊，你 ê chiaⁿ 手亦 beh 救我。8 關係我 ê 事，耶和華 beh 成伊；耶和華 ah，你 ê 慈愛永遠 tī-teh；求你莫得放 sak 你 ê 手所造 ê。

共同經課-3 哥林多後書四章十三節～五章一節

13 總是阮已經有 chit-ê 信 ê 神，tú-tú 照所記載講，我有信，所以有講；阮也信，所以也講。14 家已知 hō 主耶穌 koh 活 ê 也 beh hō 阮 kap 耶穌 koh 活，koh beh 引進阮 kap lín saⁿ-kap khiā tī 伊 ê 面前。15 因為萬項事 lóng 是為 tiòh lín；beh hō 恩典 tùi 人 ná choē 來 ná 加添，就 hō 感謝益發充滿，致到上帝得 tiòh 榮光。16 所以阮無餒志；阮 ê 外體雖然敗壞，但是阮 ê 內心日日換新。17 因為阮目 nih 久，輕輕 ê 艱苦是 kā 阮成上等上永遠 ê 大榮光；18 因為阮 m̄ 是看 tī 所能看見 ê，是看 tī 所 boē 看見 ê；因為所能看見 ê 是暫時，所 boē 看見 ê 是永遠。5:1 因為阮知阮 tī 地裡布棚 ê 厝若毀壞，就有 tùi 上帝所起造，m̄ 是人 ê 手所造 ê 厝，是永遠 tī 天裡 ê。

共同經課-4 馬可福音三章二十節三十五節

20 耶穌入厝，眾人 koh 聚集，致到 in boē 顧得食。21 伊 ê 親人聽見，就出來 beh kā 伊掠 teh；因為講，伊是癲狂。22Tùi 耶路撒冷落來 ê 經學士講，伊是 hō Piát-se-pok 附身；koh 講，伊是 oá 靠鬼王來趕鬼。23 伊叫 in 來，設譬喻 kā in 講，撒旦 t 海-thó 話趕撒旦？24 國家已爭拚，hit-ê 國就 khiā boē-tiâu。25 家若家已爭拚，hit-ê 家也 khiā boē-tiâu。26 撒旦若起來家已爭拚，伊也 khiā boē-tiâu，的確會滅。27 無人會入猛人 ê 厝來劫伊 ê 家伙；tiòh 事先縛 hit-ê 猛人，然後 chiah beh 劫伊 ê 厝。28 我實在 kā lín 講，見若世間人所犯 ê 罪，kap in 所謗瀆一切謗瀆 ê 話，lóng beh 赦免 in；29 獨獨見若謗瀆聖神 ê，永遠無得 tiòh 赦免，就是患 tiòh 永世代 ê 罪。30 這是因為 hiah-ê 人講，伊患 tiòh 邪神。31 伊 ê 老母 kap 伊 ê 兄弟來 khiā tī 外面，差人去叫伊。32 有 kui 陣 ê 人圍伊 teh 坐；有人 kā 伊講，你看，你 ê 老母 kap 你 ê 兄弟 tī 外面 teh chhē 你。33 伊就應講，甚麼人是我 ê 老母，我 ê 兄弟 ah？34 就四界看 hiah-ê 圍伊 teh 坐 ê 人講，35 你看，我 ê 老母 kap 我 ê 兄弟。因為見若行上帝 ê 旨意 ê，就是我 ê 兄弟姊妹 kap 老母。